

Comision Celebracion Dianan Nacional y Ministerio di Cultura ta invita un y tur pa diasabra awor

E estatua di Libertador Betico Croes ta simboliza union di e pueblo Arubano

STA. CRUZ -- Diasabra awor ta un dia sumamente importante y historico pa e pueblo Arubano, na momento cu ta tuma lugar develo di e estatua nobo di e gran estadista y luchador di e causa Arubano, Libertador Gilberto François 'Betico' Croes.

Tin un expectativa hopi grandi pa e ceremonia di develo aki ya cu ta hopi aña caba cu e comunidad Arubano a warda pa e momento historico yega p'asina admira e estatua nobo cu siguramente lo haci un impacto riba e publico presente. Manera ta bon conoci caba,

e estatua nobo aki tin hopi aña na Aruba y por fin e momento a yega pa e pueblo Arubano cera conoci cune. Un estatua hopi imponente cu ta digno y na honor di un estadista grandi y Libertador di e pais aki.

Mescos cu e otro estatua, e estatua aki tambe ta simboliza e union di e pueblo Arubano. Hecho ta cu Betico Croes tabata un persona cu a kibra cu tur segregacion y a boga pa den e pueblo aki no tin distincion mas entre color, raza, religion, status social y e diferente districtonan. Ta a base di e union aki Aruba por a cera un mokete duro contra

tur esnan cu tabata contra pa nos haya nos libertad estatal.

Ta p'esey Comision Celebracion Dianan Nacional (CCDN) ta haci un suplica na henter comunidad sin distincion pa atende e ceremonia di diasabra anochi pa 8:00.

Ban nos tur hunto manera un solo famia sacrifica un rato di nos tempo pa bay na Plaza Libertador Betico Croes, pasobra e sacrificio cu Betico a haci durante su bida pa awe nos ta un pais autonomo den Reino Hulandes, ta digno di un pueblo agradecido.